

DATE: 25/10/2007

20,000 peluang kerja di MSC@Meru Raya

Lembah Kinta manfaat pelaburan asing besar dari AS, Dubai

Oleh Ridzuan Yop
dan Shamsul Kamal Amarudin

MSC Malaysia Cybercentre@ Meru Raya di Ipoh yang dilancarkan semalam menarik dua pelaburan asing besar, masing-masing syarikat berpangkalan di Amerika Syarikat, manakala satu lagi membabitkan dari Dubai.

Pelaburan yang bakal dibuat syarikat Amerika itu bakal menawarkan kira-kira 20,000 pekerjaan, sementara syarikat Dubai itu pula sedia melabur kira-kira RM700 juta.

Perdana Menteri, Datuk Seri Abdullah Ahmad Badawi yang melancarkan pusat siber baru itu menganggap kedua-dua pelaburan itu petanda baik pembangunannya.


Beliau menegaskan, kerajaan sedang menimbang permohonan pelaburan daripada beberapa syarikat lain.

"(Permohonan syarikat) yang lain masih dalam pertimbangan, tetapi dua syarikat ini mengesahkan pelaburan mereka.

"Dengan minat yang ditunjukkan, saya percaya MSC Malaysia Cybercentre@ Meru Raya akan berkembang dengan cepat dan membantu kemajuan dalam bidang teknologi maklumat dan komunikasi (ICT) dan bidang lain yang berkaitan di negeri ini," katanya pada sidang media di Ipoh, semalam.

MSC Malaysia Cybercentre@ Meru Raya di kawasan seluas 83.6 hektar mendapat pengiktirafan status Koridor Raya Multimedia daripada kerajaan pada 18 Mei lalu, sekali gus meletakkannya setanding dengan Cybercentre dan Cybercity MSC lain di negara ini.

Abdullah berkata, sebelum ini ada



TANDA PENGIKTIRAFAN: Abdullah menyampaikan Sijil Status MSC Malaysia Cybercentre kepada Ketua Pengarah Eksekutif Sofloc Malaysia, Lee Soon Hoe sambil diperhatikan Tajol (tengah) di Ipoh, semalam.

pihak tidak berpuas hati kerana kawasan Lembah Kinta dikecualikan daripada Wilayah Ekonomi Koridor Utara (NCER) atau mana-mana wilayah pembangunan ekonomi lain.

Bagaimanapun, Perdana Menteri menegaskan, kerajaan sebenarnya mempunyai perancangan lain bagi membangunkan kawasan yang turut menempatkan ibu negeri Perak, Ipoh.

"Saya menyatakan sudah tentu ada pembangunan lain yang akan dibawa ke sini dan MSC Malaysia Cybercentre@Meru Raya adalah perancangan yang akhirnya akan jadi pemangkin kepada pembangunan seluruh Perak.

FAKTA NOMBOR

MSC Malaysia
Cybercentre@ Meru Raya

RM700j

Nilai pelaburan syarikat dari Dubai

83.6ha

Luas kawasan

"Bidang ICT mampu menjadi pemangkin kepada kemajuan dalam sektor lain," katanya.

Sementara itu pada majlis pelancaran MSC Malaysia Cybercentre@ Meru Raya itu, Abdullah turut menyaksikan majlis pemeteraian perjanjian antara kerajaan Perak dengan WCIT 2008 Sdn Bhd untuk menjadi rakan kongsi Kongres Teknologi Maklumat Sedunia Ke-16 (WCIT 2008) di Pusat Konvensyen Kuala Lumpur (KLCC), pertengahan tahun depan.

Penyertaan itu satu daripada strategi untuk meletakkan Perak sebagai destinasi pilihan pelabur teknologi maklumat dan komunikasi (ICT) pada masa depan.